

Na osnovu člana 6. stav 1. tačka b) Zakona o javnim preduzećima u Federaciji Bosne i Hercegovine ("Službene novine Federacije BiH", broj 8/05,81/08,22/09,109/12) i člana 27. Statuta Javnog preduzeća „Parkinzi“ d.o.o. Gradačac, Opštinski načelnik u funkciji Skupštine JP „Parkinzi“ d.o.o. Gradačac d o n o s i

## **ETIČKI KODEKS**

### **Javnog preduzeća „Parkinzi“ d.o.o. Gradačac**

Ovaj Etički kodeks primjenjuje se na:

1. Sve zaposlene u javnom preduzeću, uključujući i pojedince i zastupnike koje javno preduzeće imenuje za obavljanje određenih djelatnosti;
2. Sve članove Nadzornog odbora i Odbora za reviziju;
3. Svako javno preduzeće ili pojedinca u čijem posrednom ili neposrednom vlasništvu je najmanje 10 % od ukupne sume glasačkih prava javnog preduzeća.

Smatra se da odnos povezanih lica (u daljem tekstu: termin "povezano lice" ili "povezana lica" u skladu sa kontekstom) postoji u svakom od slijedećih slučajeva:

#### **Načelo 1**

##### **Sukob interesa**

Povezano lice dužno je izbjegavati stvarne ili očigledne sukobe interesa sa javnim preduzećem u ličnim ili profesionalnim odnosima.

Sukob interesa javlja se kada lični odnosno profesionalni interes povezanog lica onemogućava, eventualno može onemogućiti, ili se čini da materijalno onemogućava interes, ili poslovanje javnog preduzeća ili sposobnost povezanog lica da ispunjava svoje obaveze i odgovornosti.

Povezano lice dužno je omogućiti uvid Upravi ili Nadzornom odboru ili drugom nadzornom organu u sve transakcije ili odnose za koje povezano lice opravdano očekuje da bi moglo dovesti do stvarnog ili očiglednog sukoba interesa sa javnim preduzećem.

Javnom preduzeću, prilikom poslovanja, nije dopušteno da povezanim licima nudi povoljnije uvjete od onih koje nudi drugim licima koja nisu povezana sa javnim preduzećem. U smislu ovog stava sljedeća lica se smatraju povezanim licima:

1. Članovi uže porodice povezanih lica do trećeg stepena krvnog srodstva ili tazbine odnosno lica koja žive u istom domaćinstvu sa povezanim licima;
2. Pravna lica koja raspolažu glasačkim pravima u javnom preduzeću;
3. Pravna lica u kojima javno preduzeće ima udio od najmanje 10% (ili manje) od ukupne sume glasačkih prava;
4. Pravna lica u kojima se najmanje 10% (ili manje) sume glasačkih prava raspolaže povezano lice;
5. Pravna lica u kojima je povezano lice ili članovi uže porodice, prema definiciji u tački I.ovog stava, član Nadzornog odbora ili Uprave.

Ako bilo koje povezano lice zna ili je moralo znati da je neko drugo povezano lice djelovalo u suprotnosti sa odredbama ovog člana, to povezano lice je o tome dužno odmah obavijestiti Upravu i Nadzorni odbor ili drugi nadzorni organ i ostale nadležne organe.

## **Načelo 2**

### **Korporativne mogućnosti**

U ispunjavanju svojih obaveza i odgovornosti, povezana lica bi trebala unapređivati legitimne interese javnog preduzeća kada se za to ukaže prilika.

Sama povezana lica ne bi trebala za sopstvene potrebe koristiti mogućnosti koje se otkriju u ispunjavanju njihovih obaveza i odgovornosti prema javnom preduzeću, odnosno koristiti imovinu javnog preduzeća ili informacije ili svoj položaj u svojstvu povezanih lica, radi lične koristi.

Rivalitet povezanog lica sa javnim preduzećem u svakom od predhodnih navedenih slučajeva kojim se nanosi finansijska šteta preduzeću ili preduzećima, nije dozvoljen.

Da li se nekom od predhodno navedenih radnji uzrokuje finansijska šteta preduzeću utvrdit će Uprava, Odbor za reviziju i Nadzorni odbor na osnovu svih relevantnih činjenica i okolnosti, uključujući i slučaj u kojem se u lične svrhe koriste mogućnosti preduzeća, bez obzira da li je preduzeće prethodno odbilo realizirati tu predloženu mogućnost u sopstvenu korist.

## **Načelo 3**

### **Stručne sposobnosti i savjesno postupanje**

Povezana lica javnog preduzeća dužna su vršiti svoje funkcije, izvršavati svoje obaveze uz dužnu pažnju, stručno i savjesno.

## **Načelo 4**

### **Zaštita i pravilna upotreba imovine preduzeća**

U ispunjavanju svojih obaveza i odgovornosti Nadzorni odbor i Uprava dužni su podsticati na odgovorno korištenje i kontrolu imovine i resursa javnog preduzeća. Imovinu preduzeća, u koju

spadaju podaci, materijali, zalihe, intelektualna svojina, objekti i postrojenja, softver i ostala imovina koja je ili u vlasništvu, pod zakupom ili se nalazi u posjedu javnog preduzeća, treba koristiti isključivo u opravdane svrhe javnog preduzeća.

## **Načelo 5**

### **Povjerljivost**

Povezana lica će poštivati povjerljivost podataka do kojih dolaze u ispunjavanju svojih obaveza i odgovornosti, osim u slučajevima u kojima objavljivanje odobri javno preduzeće ili je takvo objavljivanje zakonski utvrđeno. U povjerljive podatke spadaju, pored ostalog, svi podaci nejavnog karaktera koji mogu biti od koristi konkurentima.

## **Načelo 6**

### **Usklađenost sa zakonom, pravilima i propisima**

U izvršavanja svojih obaveza i odgovornosti, Nadzorni organ i Uprava dužni su aktivno učestvovati u kontroli provođenja važećih zakona, pravilnika i drugih propisa u javnom preduzeću. Pored toga, ako bilo koje povezano lice dođe do saznanja o bilo kojoj informaciji za koju smatra da predstavlja dokaz o materijalnom kršenju zakona, pravilnika ili propisa koji se odnose na javno preduzeće, to povezano lice dužno je ukazati na tu informaciju jednom ili više slijedećih lica: predsjedniku Nadzornog odbora, skupštini javnog preduzeća, policiji i drugim nadležnim organima.

## **Načelo 7**

### **Podsticanje prijavljivanja nezakonitog ili neetičkog ponašanja**

Nadzorni odbor i Uprava dužni su uticati na javno preduzeće da aktivno unapređuje etičko ponašanje i podsticati zaposlenike na prijavljivanje dokaza o nezakonitom ili neetičkom ponašanju pojedinih zaposlenika javnog preduzeća.

## **Načelo 8**

### **Krediti članovima Uprave i Nadzornog odbora**

Javnim preduzećima nije dozvoljeno da na neposredan ili posredan način (kao i putem supsidijara ) dodjeljuju ili organizuju dodjelu individualnih kredita članovima Nadzornog odbora, Uprave, Odbora za reviziju i zaposlenicima te produžavanje ili materijalna izmjena postojećih kredita dodjeljenih tim osobama. Uprava i Nadzorni odbor ne bi trebali tražiti ili pomagati u dobijanju individualnih kredita od javnog preduzeća u suprotnosti s prethodno navedenim.

## **Načelo 9**

### **Razumijevanje i postupanje u skladu s ovim kodeksom**

Od povezanih lica očekuje se da djeluju u skladu s odredbama ovog kodeksa. Odgovornost je svakog lica da prouči i da se upozna sa ovim kodeksom, da kod glavnog pravnog savjetnika javnog preduzeća traži dodatno pojašnjenje i savjet u vezi sa tumačenjem i zahtjevima ovog kodeksa, kao i u vezi sa svakom situacijom koja je naizgled u suprotnosti sa kodeksom.

## **Načelo 10**

### **Odstupanje i preduzimanje disciplinskih mjera**

Nikakva odstupanja od odredaba ovog kodeksa niti izmjene i dopune odredaba ovog kodeksa nisu dozvoljeni. Svako kršenje odredaba ovog kodeksa rezultiraće neodložnim pokretanjem disciplinskog postupka i izricanjem disciplinskih mjera i eventualnim smjenjivanjem. Ovaj Etički kodeks stupa na snagu danom donošenja.

Javno preduzeće „Parkinzi" d.o.o.  
Broj: .....75...../14  
Gradačac.....15.09.....2014.godine

Predsjednik Skupštine

.....